

CHI L'È QUELL LÌ

On dì, inscii per passà el temp
caminavi in la piazza del mè paes.

Vardavi i gent

che passeggiaven e cicciaraven content.

Je vardavi in faccia per capì

che vitta avevan faa fina a quell dì lì.

E intant che osservavi sta gent in strada,
gh'hoo vist vùn, cont la barba minga fada,
i scarp pien de polver, e on trà là de vestii.

L'andava incontra a duu spositt,

ma prima ch'el podess dì ona paròlla

quij là l'hann casciaa via, come ona tòlla.

Allora l'é andaa vers duu òmen, in osteria
cont el biccer in man, in allegria.

Ma prima anmò ch'el fuss arent, cont el brasc
gh'hann faa segn de sgamelà.

'Sto pover Crist el s'è vardaa in gir, de chì e de là,
e l'è vegnuu vers de mì, on poo rabbiaa.

Mì subet, per compassion, on poo de danee gh'hoo slongaa,
ma lù, senza nanca la man vardà

el m'ha ditt:

“Ma vialter de 'sto paes, che gent a sii?

Vun el pò nanca domandà on'informazion
ch'el tratten da barbon.

Mì gh'hoo bisògn de nagòtt, voeuri domà savè
indoe podi trovà on barbee”.